



清刻龍藏佛說法變相圖

佛說無所希望經 一名象步經

慕二

西晉三藏法師竺法護譯

聞如是一時佛遊王舍城靈鷲山與大比丘  
 衆俱比丘五百菩薩六萬一切大聖神通已  
 達逮得總持所成辯才而無罣礙班宣經道  
 常無二言神足變化不可思議衆行備悉普  
 無不入其名曰無損進意菩薩度音響雷震  
 威菩薩夜月華菩薩大雨電言辭菩薩觀無  
 底度境界菩薩超山頂菩薩欣樂今悅菩薩  
 多離垢莫能當光菩薩決衆生性誼度菩薩  
 得堅強如金剛菩薩於諸音響最妙菩薩越  
 梵威聲菩薩稱自在可畏莫能犯菩薩積諸  
 德本如壘寶菩薩文殊師利童真菩薩如是  
 上首六萬開士於時賢者舍利弗在於獨處  
 一心禪思從宴坐起往詣佛所彼時世尊坐

於樹下逮寂隨響三昧正定時舍利弗住遠  
世尊遙見大聖威儀禮節寂然和雅尋即求  
草敷一面坐而結跏趺真正其身而不傾倚  
適坐竟心自念言至未曾有如來至真威神  
光儀不可稱載安隱道本猶是之故羣生得  
安所可逮致無上正慧咨嗟功勳皆了諸法  
靡不通達於時大聖靜然安和從三昧起聲  
歎發音時舍利弗聞佛世尊聲歎發音善心  
生焉得其本願前進佛所一心而住稽首歸  
命志懷踊躍尋歎此偈而讚頌曰

若有衆生不懷妄想未曾著念於諸經典  
遊步世間平等獨歡則能常忍於斯經法  
衆生無能見其瑕短斯等信解如幻自然  
選擇諸法了如虛空不見吾我爾乃大安  
其不思想一切衆生不念衆生若無衆生

未曾逮得一切思想不見吾我乃為大安  
從始已來不想合會不為有想之所迷惑  
不令興立亦無所住不見壽命爾乃安隱  
若有明智不倚衆生則於法界而無鬪諍  
棄捐一切衆人之想無若干念乃為安隱  
其常建立於禁戒者能仁一切不懷慳嫉  
而住於法無有計數不見怯弱爾乃為安  
若以忍辱安和超衆彼未曾有諍訟之貪  
不得精進亦不懈怠不想忍辱爾乃為安  
諦住堅固一心禪思心無所念除其憤亂  
曉了諸法而在等定其不想禪爾乃為安  
若不明達亦無智慧亦復不從無智之教  
不懷了了亦無愚冥無智慧想爾乃為安  
如處閑居聚落亦然於斯二事而修平等  
亦不惟惡是為聚落不思閑居是乃為安

假使行索具足分衛亦不念言吾身求食不自咨嗟我行乞食無分衛想是乃爲安其從久遠著弊壞衣受取執持於斯身形不自歎言我著麤服不憍慢人爾乃爲安諸佛所教安住勅示三品之衣不離其體不自想念我不違禮不自欣豫爾乃爲安其能班宣微妙之法不計吾我不著衆生不自譽言我爲講法不倚音聲爾乃爲安諸於德本不懷妄想不堅固想不念居業心中所懷不思清濁身不造行是乃爲安若以興起無興起想某二有所住立三不想其處夙夜精進經行應節其無言辭是乃爲安設不思念住與不住常無妄想奇特之念如來外學不以殊別不懷勝想是乃爲安其不計數安隱之想等如虛空無所踰越

心不懷念吾我衆生不見殊特爾乃爲安若了幻化如夜所夢逮得辯才志不忽忘遊於世間如水中月無有進退爾乃爲安若了善權明見真諦其言有身無一堅固則能覺了寂然之法不行妄想爾乃爲安於是世尊讚舍利弗曰善哉善哉所知深遠奉行慧義極究竟矣以法談言應道妙歸何其快乎今舍利弗諸所遊止耆闍崛山周旋學者比丘菩薩普令會此啓受道教時舍利弗尋即白佛我不堪任請令集會所以者何諸大士等威勢過龍道智無盡非吾所及於時世尊從身放光明照於三千大千世界尋時佛界諸菩薩衆蒙此明曜如一念頃皆來集會於靈鷲山行詣佛所稽首足下繞佛三市還住空中閑居比丘及諸菩薩來詣佛所

稽首於地還坐一面王舍大城無數人民百  
千之衆行詣佛所稽首足下却坐一面於是  
世尊見無數衆皆來集會舉其尊顏瞻文殊  
面尋復即笑文殊師利即從座起偏出右肩  
右膝著地又手問佛向者所笑爲何變應如  
來至真未曾虛欣佛告文殊今靈鷲山有萬  
菩薩俱講經典經名喻象於往昔亦曾所  
論賢者阿難聞佛所說即從座起更整衣服  
長跪叉手稽首自歸善哉世尊愍傷衆生令  
致永安唯當班宣此喻象經斯法難值衆所  
希聞願欲時說一切諸部皆來雲集聽此經  
典必當逮得深入光明幽與玄妙所以者何  
如來至真尊無雙比三界無侶向者尊顏觀  
文殊師利面應時即笑此非虛妄會當有意  
佛言善哉善哉阿難汝乃觀察殊異德本所

可識者慧不可限阿難諦聽善思念之當爲  
汝說向者笑意於是阿難與諸大衆受教而  
聽佛告阿難若有衆生信樂斯法舉動進止  
如象遊步信此法者彼等之類如大象遊亦  
如龍步愛喜此法真諦義者爲師子步舉動  
進止尊無儔匹佛語阿難此經典要悅諸菩  
薩是經法教順菩薩衆應當諮受本宿功德  
現於目前我逝之後此經典者歸諸菩薩令  
手執持志靜意定所以歸空口誦心思是菩  
薩藏不歸薄德闇塞菩薩不歸懷毒諂僞菩  
薩之身也亦復不歸多願妄想菩薩之手也  
爾時世尊即顯瑞應感動文殊文殊師利應  
時知之即自念言我欲啓問如來至真深遠  
之法一切聲聞及與緣覺所不能逮諸菩薩  
衆履迹瑞應爲何等類文殊師利前白佛言

第二

四

卷二

五

唯然世尊今欲啓問如來至真平等正覺設見聽者乃敢自陳佛告文殊師利恣所欲問諸大衆會悉來集此并當蒙恩文殊師利即白佛言何謂菩薩而得建立諸功勳法普現一切諸菩薩行開化無數不可計會衆生之類現諸佛國如水中月佛言善哉善哉文殊師利向所問者粗舉其要如來當爲具足分別令致建立功勳之德諦聽諦聽善思念之文殊師利與諸大衆受教而聽佛告文殊師利若有菩薩當行六法爾乃能具足道義之教立於一切功勳之德何謂爲六若有菩薩奉行於度無極一切所有施而不倦無所貪惜具足順行不自見身建立禁戒不犯衆惡不見吾我而曉了義成就忍辱柔和安雅心不懷恨覩已解脫不在結滯殷勤精進身無

所行心無所懷分別一切一心正行志於解脫門曉了便宜定意正受心常永安不慕一意解暢智慧以爲道業自覩其身不離五趣諸所生處皆令蒙度是爲六法菩薩所行備悉此法具足一切功勳之德佛告文殊師利復有六法具足此事建立一切功勳之法何等爲六一曰菩薩往詣地獄攝護拔濟燒炙之患使生天上其在畜生擾攘不安迷惑憤亂不識義理攝取其性顯以柔和微妙之法其在下賤庶民小姓則以開示轉輪聖王豪貴之位皆以普現諸生五趣而等開度所生之處與衆超異明曉隨時入諸佛土而於法身無所動移無來無去而悉徧現諸佛國土演萬億音暢出言教各令得聞其心常定不偏不黨志性蕩蕩是以六法菩薩建立一切

功勳文殊師利復問佛言何謂菩薩攝護地獄使生天上佛告文殊師利菩薩大士以大蓮華三昧正受將護地獄就徃拔濟則令于彼一切得享天祚之安用以衆生被苦惱故顯示忉利最選之宮見此厄難因則患厭而得度脫諸所受惱爲地獄人而說經典令無央數百千之衆度地獄痛是爲菩薩攝護地獄令得拔濟燒炙之患已常順法無所違失文殊師利復問佛言何謂菩薩攝護擾攘拔濟畜生迷憤之厄生於人間安樂之處佛告文殊師利菩薩大士有三昧定名曰寂滅以是三昧正受之時因能攝護在畜生者令心不亂志性和悅則得安隱生於人間守護三事爲說經法令無央數衆生之類建立道法是爲菩薩攝護畜生迷憤之厄令生人間文

殊師利復問佛言何謂菩薩生於下賤庶民小姓而得更受轉輪聖王安隱之德佛告文殊師利有三昧名入於清澄定意正受因其三昧越諸種衰使皆清淨雖生小姓則得更受轉輪聖王安隱之德是爲菩薩生於下賤庶民小姓而受轉輪聖王安隱之德文殊師利又問何謂世尊菩薩普顯生諸五趣與衆超異佛告文殊師利有三昧名遣諸行照明殊特以此定意正是菩薩住斯定時普顯五趣導御衆生令得超異殊特之行皆發無上正真道也文殊師利復問佛言何謂菩薩隨時方便普入一切諸佛國土於本法身不動移處不來不去普顯一切諸佛國土如月現水佛告文殊師利有三昧名咸入諸音菩薩以是定意正受立時能現已身在於十方東

西南北四維上下不動移處不來不去住彼  
定意覩見十方諸佛世尊聞所說經是為菩  
薩不動移處隨時方便普顯一切諸佛國土  
如月現水不來不去菩薩如是所周旋化亦  
無往來文殊師利復白佛言何謂菩薩演萬  
億音暢出言教各令得聞佛言文殊師利於  
是菩薩逮得無量迴轉總持達知無限衆生  
志性隨其言語各暢辭聲分別無數諸響言  
教而解其意達其所趣逮此總持演一切音  
普令得聞各各開解辭不錯謬是為菩薩演  
萬億音暢出言教各令得所於是文殊師利  
前白佛言唯然世尊諸菩薩等善權方便難  
及難及超絕無侶是經典要諸菩薩學常所  
啓受當以何業至信脫門佛告文殊師利菩  
薩欲學斯經典者則當信解虛空之門又問

世尊何謂虛空佛告文殊師利其虛空者則  
謂虛無無有塵汙無恚害心亦不忽忘一切  
諸法亦復如是無汙無害亦無忽忘猶如虛  
空不成布施不具持戒忍辱精進一心智慧  
永無所生如是文殊師利一切諸法不成施  
戒忍進寂慧猶如虛空以是之故無解無除  
一切諸法亦復如是無解無除猶如虛空有  
所行者無所造證一切諸法亦復如是則無  
所行亦無造證猶如虛空無有闇冥亦無明  
耀諸法如是無闇無明猶如虛空曠然無際  
不可捉持諸法如是普無齊限不可捉持猶  
如虛空無有正路亦無邪徑諸法如是無路  
無徑亦無邪正猶如虛空不建立身離諸漏  
行不學聲聞不志緣覺不著諸佛無上大乘  
諸法如是不學聲聞緣覺大乘猶如虛空無

有思想無所分別諸法如是無有妄想法亦無分別猶如虛空無舉無下無進無怠諸法如是無進無怠猶如虛空無應無不應無雙無不雙諸法如是無應不應無雙不雙猶如虛空普照衆生無能塵汙今不淨者諸法如是至於滅度永無塵汙以是之故不可滅除無能移去猶如虛空無所建立亦無所住不動不搖無處所故佛告文殊師利菩薩大士解諸衆生無有住處不當觀察見有處所逮致本際不動不搖無住無不住佛言如是文殊九師利彼法自然其欲得見如來至真則爲邪見其邪見者求入正見入正見者是爲泥洹非大德果無大功勳其至泥洹非大德果無功勳已則世衆祐其世衆祐則於衆祐無所希望其於衆祐無希望已則能具足虛靜之

慧已具靜慧則能速成無所從生法忍時彼衆會六十比丘皆懷甚慢各心念言今者如來班宣冥路迷惑之訓諸外邪學悉有是辭何以爲行向者世尊復演此教亦如不蘭迦葉摩訶離瞿耶樓阿夷帝基耶今離披休迦旃先比盧持尼犍子等悉說此言何緣如來亦演斯辭有何殊別云何則之所當遵修以何爲業爾時世尊知諸比丘六十人等懷甚慢者心之所念尋時即告文殊師利佛爲如來至真正覺班宣經典亦與外道異學俱同等無差特又外異學不能分別如來說法義之所歸六十比丘適聞此言益懷憂感意不歡喜甚不欽樂講是經義即從座起無何而去文殊師利告諸比丘諸賢者等欲何所湊時諸比丘報文殊師利曰吾等不解是法所



說為何所歸時舍利弗告諸賢者等斯義善哉當以此事重白其意且待須臾我當啓問如來至真何故說此時諸比丘聞舍利弗宣如是教還復故坐時舍利弗則前問佛何故如來班宣此言令諸比丘皆懷猶豫唯願世尊加哀垂恩爲決結網彼時世尊告舍利弗於意云何其有比丘漏盡意解無餘縛結聞此言教寧懷狐疑心怖懷乎答曰不也世尊以見諦者奉比丘行於一切音諸所言辭不恐不怖亦不懷懼何況比丘漏盡意解無餘縛結懷疑恐也佛告舍利弗或有愚人意塞慕二沉冥於未曾有法而懷妄想速虛空行時舍利弗復問佛言唯願大聖發遣斯教章句所趣令諸會者蠲除沉吟心中坦然佛告舍利弗其有夢中見如來者爲寧審見真人形乎

如來謂此夢中所覩則非真實不爲堅要皆因思想計所思想審無有想無合會想無所有已則解如來無所分別想無審諦想不懷想想無合會想無所有則解一切衆生萬物皆爲虛妄不見真實便能曉了諸法迷惑顛倒放逸以能曉了諸法迷惑是故如來具足宣暢迷惑邪見以能分別一切諸法皆爲邪見則不復隨迷惑邪疑六十二見是爲舍利弗若有欲觀如來至真則墮邪見是故舍利弗如來說此若有欲觀如來身者則墮邪見除見聞想爲觀如來乃無邪見時舍利弗復問佛言何謂世尊其邪見者令入正見佛告舍利弗一切愚戇凡夫之士諸所妄想念應不應所可發起立在處所則於此事而不信之無所建立精進懈怠無雙無隻起自見身

我人壽命依倚計吾而貪著我曉了分別如此色像見聞念知喜樂所說悉無所有如是所有審無所有是爲所生此無所生是爲虛妄是真實言皆無所有其虛妄者則當知之爲無儔匹無像之謂以無儔匹則成邪見佛謂舍利弗其如是像見諸虛妄了不以惑是謂邪見則與外道邪見俱同以是之故舍利弗知其墮邪見緣致正見時舍利弗復問佛言何謂正見施與彼者其福不大功勳不遠佛告舍利弗假使有人如是像施彼衆祐則成無爲親近無爲其無爲者無有少福無大功勳無小名稱亦不大稱所以者何其無爲者皆離一切功德之報無有處所時舍利弗復問佛言如來至真云何講說無爲而無處所本歎無爲最爲奇特功勳無限佛告舍利

弗愚駮凡夫衆行茂盛計有吾我及人壽命如來故爲咨嗟無爲功勳無量顯其處所欲令衆人斷終始患故歎殊特又舍利弗當察賢聖非賢非聖亦非衆祐當作斯觀成就賢聖離欲衆祐猶如農夫隨其所種各得其類及依穀苗或生荆棘草穢之瑕於舍利弗所志云何爲是農夫所報實乎本種荆棘草穢瑕耶舍利弗答曰不也世尊佛言如是舍利弗設如農夫下種子田依倚於此誕生荆棘地之荒穢若變爲苗如是舍利弗施於賢聖欲立功德不能歡悅此非好種不成爲果將無所獲若不建立無爲之田則當知之生死果報是故舍利弗欲致平等無爲則非大福非大功勳時舍利弗復問佛言唯然世尊何修無爲非有大福非大功勳布施田等其福

卷二

十二

云何在世衆祐佛告舍利弗假使不懷小福之想無大福想是爲種植衆祐之德以能種植衆祐之德明靡不曜不受果報是則天上世間諸類之大衆祐若舍利弗建此施者無盡德田不受其華不獲其實以是之故如此施者非有大福非大功勳是世衆祐不受果報舍利弗復問佛言云何世尊爲世衆祐入於衆祐無受果報乎佛言於舍利弗所志云何所施衆祐依於無爲又計其法有報應乎舍利弗白佛無也世尊其以無爲施於衆祐不受報應則無果證其無爲者則無所求賢聖之士亦無所望時佛讚曰善哉善哉舍利弗誠如所云在世衆祐也假使有人施此衆祐則無希望報時舍利弗復問佛言云何世尊有所施者而無報應具足空慧佛告舍利

弗其能曉了一切諸法悉自然者彼義爲實爲是虛耶白世尊曰其能曉了諸法自然則能分別自然如幻其能曉了諸法如幻彼應虛無了虛無慧所以者何一切諸法自然如幻是佛所說其如幻者彼謂虛無虛無之慧是故世尊曉了諸法自然如幻所以者何計於法不有所成亦無所獲佛言善哉善哉舍利弗如汝所云假使有法實有處所有者念行真諦則不復知衆生滅度無爲之義用一切法虛無無諦而無真實以是之故開化度脫如江沙等五趣衆生令得滅度衆生之類而無損滅悉由衆生因虛無出也如是舍利弗以故衆生所想虛無其所思想無所逮得是故名曰具虛無慧因此所學用施衆祐無報應果具虛無慧也時舍利弗復問佛言云

何具足虛無之慧以是之故能疾速成無所  
從生法忍佛言其於虛無而不造證是則名  
曰具虛無慧又舍利弗何謂虛無知身虛無  
我人壽命亦復虛無見於斷滅而計有常衆  
事牽連亦復虛無佛法聖衆無爲之想療治  
心意諸念思想心所遊逸皆悉虛無故舍利  
弗其能諮受如是像比當了斯慧以至解脫  
此舍利弗具虛無慧分別若斯則能疾速無  
所從生法忍說是語時四萬菩薩尋時皆速  
無所從生法忍時六千人發大道意三萬六  
千天子值遇慧時當近道迹其六十比丘懷  
甚慢者漏盡意解至無趣餘異口同音而俱  
舉聲白佛言我等世尊從今已往奉六師教  
而因出家佛非我師不奉受法不歸聖衆從  
今已往悉無所作亦無報應不與罪疊亦無

惡趣一切衆會聞說斯義無央數人悉懷驚  
愕不知云何各心念言斯等比丘將求迷惑  
遠佛違法捨於禁戒就外異學所以如是今  
演此辭時舍利弗知諸衆會心之所念即時  
告此諸比丘言仁等何故發於斯言吾等之  
身從今已往無佛世尊其二因從異學出爲沙門  
時諸比丘報舍利弗吾從今始敬事六師一  
切所歸爲一相耳不倚六入是以不見若干  
種師不想出家沙門也舍利弗復問何故諸  
賢復發此言從今日始不以佛爲聖師諸比  
丘報曰從今日始自在其地不在他鄉自歸  
於已不歸他人已爲師主不用他師是以故  
往不以佛爲聖師所以者何其佛正覺不離  
吾我其吾我者不離於佛時舍利弗又復更  
問諸比丘衆賢者等何故復言從今已往不

啓受法不歸聖衆比丘答曰不得諸法所可  
 歸念亦無合集故不歸法衆舍利弗復問諸  
 比丘何故發言從今已往無所造業亦無所  
 作諸比丘曰從今日始曉了諸法一切無作  
 其無作者亦無非作以是之故從今已往無  
 所造業舍利弗應時復問仁等何故向者說  
 言從今已往無有果報諸比丘答曰用愚不  
 解故趣生死纏綿終始吾等愚盡無緣無報  
 以是之故從今已往無有果報時舍利弗復  
 問之曰仁等何故復發此言從今已往無有  
 殃十五豐諸比丘曰吾等曉了一切諸法皆寂滅  
 度吾等解了一切諸法無法無報所以諸法  
 無有果報因是之故而發斯言從今已往無  
 有殃豐時舍利弗復問言曰諸人何故復發  
 此言從今已往無有惡趣諸比丘曰吾等從

今曉了一切諸法所趣永無惡趣其無開化  
 無不開化無律不律以是之故從今已往無  
 有惡趣亦無不趣無律不律時諸比丘說如  
 是比棄自大義時彼聞者三千六百比丘漏  
 盡意解至無趣餘於是世尊讚諸比丘曰善  
 哉善哉其於諸法無所得者乃為真得又問  
 世尊何謂於法有所逮得佛告文殊所謂得  
 者謂逮無所從生法忍文殊師利又問若有  
 菩薩欲樂逮得無所從生法忍當云何學如  
 何建立何謂奉行佛時欲解文殊師利學法  
 無上游一切智諸通慧義常當遵習無所從  
 生法忍佛爾時頌曰  
 欲慕學佛慧 一切慧中尊 不受於諸法  
 亦復無所捨 法者無所得 亦不起成就  
 諸法無所有 愚者欲令有 欲為除此言

故為眾說法	反志樂所生	不信無所起
若能棄魔事	佛道尊無上	著已生愚冥
故不了此義	以興若干種	愚者見各異
其生無若干	一切為一相	佛者世間慧
為凡夫說之	用計吾我故	不能奉修道
念言當久如	滅盡於貪姪	遠離瞋愚冥
令吾無塵勞	無有而想有	斷滅於滅度
開化貪欲恚	故說寂然空	演盡無所生
故歎於泥洹	方便讚滅盡	離佛法甚遠
想施奉禁戒	若希望樂道	是不修佛教
為慕學思想	<sup>業二</sup> 愚者感虛妄	<sup>十六</sup> 不解空無法
諸法一等相	反懷若干念	若曉了此法
諸法自然相	如人觀五指	得道然不難
道不離人遠	亦復不在近	精勤求妄想
以故離人遠	愚者行各異	展轉相求短

是人奉禁戒	此者凶犯惡	善施行正法
有為悉虛無	不復受神識	如幻無所見
無有奉戒相	亦復無犯惡	諸法因緣合
彼亦無吾我	若於億千劫	布施無等雙
將養上禁戒	導師不受決	若以去思想
無施無所望	棄捐諸希求	然後見授蒞
說布施得富	持戒生天上	其無所逮得
此乃無上道	愚者倚顛倒	妄想有所求
吾當致法忍	無起無為業	無所從生法
心不念所生	逮法忍不難	不更億千劫
假宣有法名	諸法所無作	無本無所作
想皆如虛空	無數億諸佛	班宣上妙法
令除姪怒癡	諸法亦無盡	諸法假使實
則當歸盡傷	以無所有故	是以不可得
姪怒癡無量	計之無涯底	設有無涯底

彼則無根本	所種無有芽	何因生華實
設不得業者	何緣當有華	無所從生法
則無有人種	衆生無衆生	不生亦不滅
猶如姪女人	彼則無有子	以無有子者
則無有子憂	明智觀如是	諸法無所生
彼便無恐懼	周旋生死苦	愚為虛偽惑
不解法如幻	受取虛空擔	患猷聖善教
若分別此法	無量無邊際	無數不可限
爾乃不患猷	如佛說本際	宣暢無涯底
當來際亦然	中際為一相	無際想有際
無底際虛無	吾已了此義	則解無二分
本際虛空想	人際不可議	其際譬如影
斯慧不可了	因以行妄想	由是退轉心
當盡斯羅網	何緣當成佛	正覺無所想
彼則無所成	諸法無所生	愚者欲令成

虛空不可捉	及宿諸處所	虛空無所住
無為無形像	如咨嗟虛空	解道亦當然
如分別了道	曉衆生亦如	衆生界悉等
平若虛空界	其能了此等	成佛道不難
不精進求度	不思念隨順	不求願諸法
成佛道無難	道離諸所願	一切斷要誓
心不抱求願	諸佛道最上	布施心自念
所施用得道	道者無所得	上道無所獲
志常懷禁戒	想精進有實	彼不承佛教
欲求望報故	諸法無勤修	而反現精進
其無所行者	此上度精進	其數如是想
此法無諸漏	斯法為有法	彼心不隨順
所講無念法	讚之如虛空	不縛亦無脫
是慧為無上	其希望奉戒	亦想犯禁者
此二俱犯禁	無二為上禁	諸法無有異

慕二

十八

無想無殊特 若解達無見 此乃奉佛教  
 其心無所生 譬之如虛空 等受如是決  
 乃為真寂志 其無所想者 一切無所念  
 無心無所生 佛道不難得 其不受貪欲  
 不為欲所使 貪則無所生 佛道不難得  
 若不厭劫數 不畏億本際 不懼生死難  
 佛道不難得

於是世尊說此頌竟告文殊師利若有菩薩  
 凡夫篤信斯經典者聞之不疑不懷猶豫受  
 持諷誦為他人說具足解義則當現致二十  
 事功德之勲何謂二十事一曰諸天神明悉  
 宿左右二曰諸大神龍而來護之三曰諸大  
 鬼神咸共衛之四曰心常安隱未曾見亂五  
 曰所生之處為眾尊長六曰世世所在常識  
 宿命七曰生生所處常得五通八曰速得法

忍加當復見彌勒菩薩九曰專精修此經典  
 之要心捐睡寐疲極之意十曰若卧寐時常  
 於夢中得見諸佛亦復當得見諸菩薩十一  
 曰用以篤信此經典故當疾速得柔順法忍  
 十二曰若有受此經典本者現世得致滅除  
 諍訟十三曰若行蛇虺毒害之蟲念是經典  
 經無恐懼十四曰思此經卷則能降伏怨讎  
 嫌隙十五曰若能專惟斯經典者便即速得  
 普光三昧十六曰若能曉了斯經典者則當  
 知之除一切罪十七曰若講斯經便能獲致  
 不可稱計百千法門十八曰世世所在不失  
 道心十九曰所生之處面見諸佛致無量轉  
 總持之要彼若思惟斯經典時諸魔波旬未  
 曾得便所至受身常見諸佛二十曰思此經  
 者所願必成二足四足舍血毒蟲悉共護之



若有非人欲來恐之王者羣臣蜚尸惡鬼欲來恐之自然有護無能犯者佛語文殊師利是爲二十功德之勲不懷猶豫法師比丘聞此經典欣然篤信而不以疑不以疑故不懷猶豫受持諷誦抱在心懷具足分別爲他人說功德如是文殊師利復白佛言譬如藥樹名曰普療皆悉除愈一切疾病斯經如是療治一切姪怒癡疾衆想之患佛言文殊師利如仁所言誠無有異斯經典者實爲消除一切衆生五陰六衰三毒五蓋十二因緣九十六徑六十二疑邪見之礙所以者何乃往過去久遠世時其劫無限不可計會其數過此時世有佛號樂師子步會無央數無限人民大衆之中講說經典時樂師子步如來至真等正覺有一菩薩名金剛幢於其佛所聞是

經典其心不疑不懷猶豫即時啓受於斯經典功德之勲持諷誦讀篤信執翫不離其心行入郡國縣邑村落州域大邦見之歡喜皆言良醫當來治我衆患之疾一心相信豫懷欣然時百千人共相聚會皆俱往詣於金剛幢菩薩之所各欲求護時金剛幢則以篤信某二悲哀之心用斯經典呪於衆人取此經中神呪諸句將護衆人以德勞之而以宿衛文殊師利彼爲何謂神呪句耶以辭呪曰無搖 離僞 以律舍 善度 不有實無有處 離迷惑 尊虛空 恍如幻 無所生 不可得 慈善慈 愍衆生 一切下 求徑路 義精進 斯無梵 此神呪是時神呪章句將護衆生若得惱病至於困疾衆患之苦痛不可言若干諸疾悉得除愈

諸天龍神及與非人所見燒者并除毒蟲蟒蛇虎狼蝨蚤蚊蜂慈念此經無能觸者病瘡疽癩若得水疾悉得除愈佛語文殊師利時金剛幢菩薩大士作此經典為衆生類皆療衆疾莫不安隱於文殊師利意所志云何時金剛幢菩薩大士為異人乎莫作斯觀所以者何則吾身是吾於彼世受斯經典篤信愛樂持諷誦讀開化饒益一切衆生是故文殊師利當觀此經如普藥樹文殊師利復問佛言其有菩薩受此神呪章句義者持諷誦讀當云何行佛告文殊師利若有菩薩受斯神呪章句義者持諷誦讀其人發意奉行是經不復食肉不以香油塗熏其身常懷慈心愍於衆生饒益一切如普藥樹常當親近一切智諸通普慧令無惱害得其便者若誦此經

常當清淨柔和其心無穢濁行諷是經時淨掃除地令無塵埃見者悅豫文殊師利復白佛言若有菩薩讀是經時棄捐貪愛不惜身命忽如無形爾乃隨教佛告文殊師利誠如所云一無有異彼時世尊告賢者阿難受此經典持諷誦讀以用加益無數衆生斯經典者所益無量阿難白佛唯諾當受如聖尊教宣如佛說佛言善哉善哉賢者阿難若受此經奉持諷誦為諸衆生施作佛事佛說如是賢者舍利弗賢者阿難文殊師利諸天人阿須倫鬼神龍聞佛所說莫不歡喜作禮而退

佛說無所希望經

